

Zavod za javno zdravstvo
Služba za školsku higijenu

Broj:
Zenica, 24.08.2020. godine

Sve osnovne i srednje škole na području ZDK
N/r Direktora

Univerzitet u Zenici
N/r Rektora

Ministarstvo za obrazovanje, nauku, kulturu i sport ZDK
N/r Ministra (na uvid)

PREDMET: Biosigurnosni model za odgojno-obrazovne ustanove u kontekstu COVID-19

Poštovani,

Proljeće 2020. godine donijelo je mnoge promjene u društvu općenito, pa tako i u odgojno-obrazovnom sistemu. Institut za zdravlje i sigurnost hrane Zenica u cjelini, a posebno njegove organizacione jedinice Zavod za javno zdravstvo i Služba za školsku higijenu u aktuelnoj situaciji sa pandemijom COVID-19 ima zakonsku, profesionalnu i moralnu obaveznu da pomogne odgojno-obrazovnom sektoru kantona na čijem području ima ingerencije, pa i šire. Ponovno otvaranje školskih objekata predstavlja veliku odgovornost, te je neophodna uska saradnja između zdravstvenog i odgojno-obrazovnog sektora.

U svjetlu posljednjih odluka nadležnih kriznih štabova i institucija o početku nastave u 2020./2021. školskoj godini dostavljamo Vam materijal čijom provedbom će se urediti način ulaska i boravka u odgojno-obrazovnim ustanovama na način da se smanji rizik od prodora novog koronavirusa među zaposlenike i učenike/studente, što bi imalo negativne posljedice po djecu i omladinu, po rad i funkciju ovih ustanova i građanstvo, ali i cjelokupan društveni sistem ZDK i šire, ali i olakšalo širenje novog koronavirusa kroz kontakte koji su neizbježni i neophodni u izvršavanju ovim ustanovama zakonom povjerenih zadataka.

U prilogu Vam dostavljamo „Proceduru za rad odgojno-obrazovnih ustanova – vodič za unapređenje biosigurnosti u kontekstu COVID-19“ sa priložima koja je usaglašena sa Ministarstvom za obrazovanje, nauku, kulturu i sport ZDK (definirano Naredbom Kriznog štaba/stožera Federalnog ministarstva zdravstva broj 01-33-4670/20 od 20.08.2020. godine u poglavlju VII – Naredbe za obrazovne ustanove, tačka 3), te prijedlog „Plana za uspostavljanje i održavanje sistema biosigurnosti u kontekstu COVID-19“ (krizni plan pripravnosti i odgovora na pojavu COVID-19 definisan istom Naredbom, istim poglavljem Naredbe, tačka 4). Sastavni dio spomenute Procedure kao prilog je i „Plan organizacije i rada za vrijeme trajanja pandemije novog koronavirusa (SARS-CoV-2) i oboljenja koje on uzrokuje (COVID-19)“ (krizni plan pripravnosti i odgovora na pojavu COVID-19 definisan istom Naredbom, poglavlje III – Naredbe za poslovne subjekte, tačka 2).

Osim ovih dokumenata i procedura, Služba za školsku higijenu Instituta razvila je „Akcioni plan za smanjenje rizika za obolijevanje od COVID-19 i povećanje biosigurnosti u školama za prvo polugodište 2020./2021. školske godine“. Ciljevi ovog Plana su: zaštita i promocija zdravlja unutar odgojno-obrazovnih ustanova, povezivanje zdravstvenog i obrazovnog sektora, obezbjeđivanje dokaza za naredne preventivne higijenske mjere, te obezbjeđivanje maksimalno mogućeg funkcionisanja odgojno-obrazovnog sektora sa zdravstvenog aspekta u kontekstu COVID-19. Provođenje ovog Akcionog plana podrazumijeva:

- posjete svim osnovnim i srednjim školama i fakultetima na području ZDK radi pružanja podrške i savjetovanja o metodologiji, kao i praćenja provođenja preventivnih higijenskih mjera,
- uspostavu sistema ranog prijavljivanja nepovoljnih događaja i savjetovanja o postupanju u vezi COVID-19 (putem telefona, e-maila, aplikacije i sl.),
- edukacije o preventivnim higijenskim mjerama za smanjenje rizika za obolijevanje od COVID-19 za menadžment, nastavno osoblje, osoblje na čišćenju i održavanju školskog objekta, učenike/studente, roditelje/staratelje, putem elektronskih komunikacijskih kanala, platformi za učenje na daljinu i sl. (lična higijena u kontekstu COVID-19, prva pomoć u kontekstu COVID-19 itd.),
- praćenje i evaluaciju sanitacije u odgojno-obrazovnim ustanovama uzimanjem briseva,
- praćenje i evaluaciju zdravstvene ispravnosti hrane i vode u školama, te
- izvještavanje o utvrđenom stanju menadžmenta škole, Ministarstva za obrazovanje, nauku, kulturu i sport ZDK, kao i javnosti u domenu koji se javnosti bude ticao.

Stručni timovi Službe za školsku higijenu Instituta prije početka nastave u periodu 31.08. – 04.09.2020. godine tokom radnog vremena 08:00 – 16:00 (te zbog kratkog vremena eventualno u prvim danima prve sedmice nastave) posjetit će sve škole na području ZDK. Do tada, predlažemo i molimo Vas da provedete preporučene preventivne higijenske mjere, izradite planove na osnovu prijedloga koje Vam dostavljamo, te time započnete uspostavu sistema biosigurnosti i samokontrole u kontekstu COVID-19. Važno je istaći da je potrebno formirati tim iskusnih zaposlenika, među kojima mora biti osoba koja ima odgovornosti i ovlaštenja da donosi odluke, koji treba da uoči rizične tačke koje Vi poznajete i prepoznajete, i mjere u svrhu sprečavanja pojave i širenja zaraze, a koristeći spomenutu Proceduru, u skladu sa Vašim procesima rada, aktivnostima, resursima, kadrom, opremom, objektima, navikama itd., a koje je nemoguće da iko poznaje bolje od Vas.

Prilikom posjete naših timova dobit ćete dežurne telefonske brojeve i e-mail koji će Vam biti konstantno na raspolaganju za savjete i/ili povezivanje sa drugim relevantnim adresama kod pojave bilo kakve sumnje, dilema, nepovoljnih događaja u školi i sl.

Neophodno je naglasiti da niti jedan sistem nije idealan i nemoguće je u potpunosti spriječiti prenos infekcije, ali zajednički možemo učiniti sve u našoj mogućnosti da rizik smanjimo na minimum, te učimo na iskustvu i kontinuirano poboljšavamo sistem biosigurnosti. Stojimo Vam na raspolaganju. O svim narednim dešavanjima blagovremeno ćete dobiti informacije.

Srdačno,

Načelnik Službe za školsku higijenu:
Doc. dr. sc. Nino Hasanica

Direktor Instituta:
Prim. dr. Senad Huseinagić

U prilogu:

1. Procedura za rad odgojno-obrazovnih ustanova – vodič za unapređenje biosigurnosti u kontekstu COVID-19 sa priložima
2. Prijedlog Plana za uspostavljanje i održavanje sistema biosigurnosti u kontekstu COVID-19